

Kunnafonisében bota kalo o kalo - BP : 24 - Téléfoni : 20.21.21.04 Kibaru bugufiyé Bosola Bamako

Musa Tenbine sugandira ka ke Mali depitebulon wɔɔrɔnan nɛmɔgɔba ye

Depite 134 y'u kandi a ma, mɔɔgɔ 8 y'a kandi Musa Mara ma. O b'a jira ko hali fanga sinamatɔnw sɔnn a k'a sugandi ka ke depitebulon nɛmɔgɔba ye.

Mali depitebulon 6nan sigira ntenendon mekalo tile 11 san 2020, Bamako lajekesoba Seyisebe (CICB) kono. Musa Tenbine sugandira fanga n'a demenbaaw fe, ka ke depitebulon nɛmɔgɔba ye. Depite 134 y'u kandi a ma, mɔɔgɔ 8 y'a kandi Musa Mara ma. Kunnafoñi minisiri, fāgabulon ce kopénabø ani gōferenaman ka kumalasela Yaya Sangare tun b'a kene kan.

Sanni nɛmɔgɔnin baaraw ka damine, bee tun joreñen don. O de la nɔgɔnyew tun cayara u ni nɔgɔn ce ; ani kerefekuma misenninw. Nege kanje 10 temennen ni sanga 40 ye, depitebulon sekereteri zenerali Modibo Sidibe ye kuma ta, k'a jira jama na, ko n'i y'a ye laje in ma ke depitebulon kono, o sababu ye koronawirisiko ye. Taabolo minnu kofora o bana in kumbenni na, walasa k'olu labato, Seyisebe de piriñna a ka ke yen. A labanna k'a ninin kiiritigelaw ka ciden Metiri Seku Ture fe, a ka depite kelenna si hake dantige jama ye. O kelen u ye biro sigi ka keje n'o cogoya ye. Mɔɔgɔ min ka kɔrɔ ni bee ye, ka fara bee fana ka kɔrɔ ni mɔɔgɔ laban fila minnu ye, olu kera o biro mɔɔgɔ ye. N'o ye Abudarahamani Nangi ye. Ale bangera san 1941. Salimata Tarawele bangera san 1994. Juwaraba Zome bangera san 1990. O biro nɛmɔgɔya dira u la mɔɔgɔkɔrɔba ma, ka denmisennin fila niñni k'a ka sekereteriye de pitew nɛmɔgɔya niñnni, an'u ka o don baara tɔ kama.

Jamana sariyasunba lafasabulon y'a jira ko mɔɔgɔ minnu kera depitew ye, Abudarahamani Nangi y'a ka sekereteriye bila ka segin k'o tɔgɔw fo. O kelen kiiritigelaw ka ciden ye jama hake jate mine n'o dafalen don nɛmɔgɔsigi kala tako la u yere dama ce. Depite 134 de tun be kene kan a don na. Jamankuntigisariya N° 2020-0240/P-RM min tara san 2020 mekalo tile 5 ka depitew wele laje balalen na, a y'u bila k'o fana kalan, ani k'u welekun yere fo. O kelen Musa Mara ye kuma ninin, ko depitebulon lataamasariya ka kalan bee k'a men, sanni u ka wotew damine depitebulon nɛmɔgɔba niñnni na. A niñnina Modibo Sidibe fe, a ka kuma u ni nɔgɔn ce sariya be min

fo o la. Ale y'a jira ko fo de be ke nɛmɔgɔba niñnni kalataw la ka kɔn don baara keta tɔw ye.

U sɔrɔla ka labenw damine o kalataw la ; n'o ye depitebulon 6nan nɛmɔgɔba sɔrɔli ye. Mɔɔgɔ saba kofora o la. Mamadu Jarasuba, Musa Mara ani Musa Tenbine. Kabini nin mɔɔgɔ saba tɔgɔfɔra, Baberi Gano min ye RPM sekereteri zenerali ye, o y'a ninin baaraw ka sonsoron ni sanga 30 nɔgɔnna ye, min b'a to ale ka se k'a ka tɔnden tɔw kumajɔgɔnya. O Baberi Gano ye Jene depite ye. O kelen Asaridi Agi Ibarakawani min fana ye Gawo depite ye, ni ADEMA tɔnden don, o y'o lajinin kelen ke. Aïnadu Sise min fana ye URD tɔden ye, o y'o lajinin kelen ke. Nin bee n'u ka tɔndenw y'u damanalajenin ke ka ben ko la. Folere kelen kuntaala nɔgɔnna kɔfɔ, fanga demenbaatɔnw ka depitew seginna ka don kene kono. U sigilen meenna ka URD mɔɔgɔ makɔnɔ ni sanga 10 nɔgɔnna ye. Tuma min na jama dafara, a kɔlosira ko ben kelen don ko do la; ka da a kan a tun be ta mɔɔgɔ ne kan, ko jɔrɔ banna u la. Kuma dɔ tun be ka nɔnunjunun, o dara kene kan. Mamadu Jarasuba y'a senbo nɛmɔgɔya niñnni na. O kunnafoñi dara jama tulo kan, ko RPM ka cèbo ye Musa Tenbine kelen dɔrɔn ye.

A tɔ tora o la Musa Mara ni Musa Tenbine fila ka kalaw ye. Wotew ka kan ka ke k'olu fara ka bɔ nɔgɔn na. Modibo Sidibe tun y'a jira ko depite do ma kene sɔrɔ, nka a y'a ka yamaruyaseñen ci ka na ; n'o ye « porokirason » ye tubabukan na. Depitew wulila kelen-kelen ka ta u sagolamɔɔ ka kala bila wotekessu kono gundo la. O b'a jira ko mɔɔgɔ 146 de wotera u la. Olu la 131 ye Musa Tenbine sugandi, 8 ye Musa Mara sugandi. Jaabiw segesegera kokura. A yera o senfe, ko Musa Tenbine ye mɔɔgɔ 134 sɔrɔ, Musa Mara ta ye 8 ye. Depite fila, ka fara Sumayila Sise kan, olu ma ye, u ma yamaruyaseñen ci ka na.

Jaabi min sɔrɔla nin kalataw la, o b'a jira ko hali fanga sinamatɔnw ye Musa Tenbine sugandi. O kera depitebulon nɛmɔgɔba sɔrɔlén ye. Abudarahamani Nangi ka sɔrɔ k'a sigiyɔrɔ labila Musa Tenbine ye, o ka temen ni baara tɔw ye.

Musa Tenbine y'a jira a ka



Photo AMAP

dantigelikɔrɔfɔw kono, k'a bena a seko damajira ke a joyɔrɔ in fali la, bee ka wasa kama. A ko a b'a sara Malidenw na, minnu y'u ka dannaya da u kan k'u ke depitew ye, k'an be don min na, geleya be jamana kono, jamanaññen degunnen don k'a sababu ke basigibaliya ani kojugubake ye. Mɔɔgɔ caman b'a la ka faga, caman ka hakew minena u la, caman fana y'u sigiyɔrɔw bila. O siratige la, a be taasibila ke mɔɔgɔ fatulenw ye, ka dugawu ke Ala ka degun in ta ka bɔ sigidalamɔɔw kan. Ka dugawu fana ke, koronawiriññi min b'an ka jamana kono, Ala k'an bɔ a bɔda juman fe.

O hukumu kono, a k'a b'a hakili to bana jugu in kumbenni waleyaw matafali la bulonba kono, ni nunabiriññi ye mɔɔgɔ fe. A y'a ninin a depiteññen fe, u ka ke dɔgɔtɔrɔw kumada ye u ka sigidaw la, koronawiriññi yeretangawalew matarafaliko la.

Musa Tenbine ye do fo fanga yelema kuraw, ani jamana sariyasunba yelemani kan ; depitebulon


kura be ka makɔnɔ o min na. A ko depitebulon joyɔrɔ mana ke fen o fen ye o kow la, a b'o ke. Depitebulon joyɔrɔ do ye k'a kandi sariya njania sirilenw na, ani ka fanga ka baaraw kecogo kɔlosi, ka laban k'u ka sigidalamɔɔw haminanko gelenw dajira fanga la. A ko minisiri minnu ye jamankuntigí ka baara bolodalenw waleyabaaw ye,

n'u weleko nana, u b'u wele bulonba kono k'u damajininka u ka ketaw la. Fanga y'a jira ko lakɔliw be sɔn ka dayele zuwenkalo tile 2 san 2020. Musa Tenbine y'o foli ke jamana nɛmɔgɔw la. Walasa kalanw ka ke cogoya juman na, a b'a ninin, gōferenaman, demenbaaw wariko ni feereko la, lakɔlikaramɔɔw, lakɔlidensomɔɔw ani lakɔlidew yere fe, bee k'a cesri ka nɔgɔn demen, min b'a to geleyaba min file kalanko la, o ka se ka ban pewu. O siratige la, depitebulon bena a nemada bee ka keta fe jamankuntigí njania labatoli la ; n'o ye here kanuni ye ni jamanaññen bee ye. Sariya N° 2015-052 min tara san 2015 desanburukalo tile 18, depitebulon 6nan nisondiyara n'o waleyali ye. O de ye Mali depite musoman hake se 41 ma nin sen na ; n'o te temenen in na 14 dɔrɔn tun don. Mali depitebulonko sigira senkan kabini san 1959. Depitemuso kelen tun b'o la n'o ye Hawa Keyita ye.

Musa Tenbine sɔrɔla k'a ninin depite tɔw fe, u ka politikikelew nɔngirin u ni nɔgɔn ce, k'u nesin jamana ka here niñnni ma. O kɔfɔ u ye jekulu kerenkerenni sigi depitebulon lataamasariya kalanní kama. Musa Tenbine y'o baaraw nɛmɔgɔya ke; a si hake be san 42 la..

Dokala Yusufu Jara

Bololatulubɔ: Koperatifu Sinsinbere ni demeni ka kan



Kolomangasa ni dibida, ani kɔlɔgosiyɔrɔ ce, Fatumata Sako ye taakase-ginko hake min ke, dan t'o la. Sɔgɔnɛgɛ kanje 9 waati tun don Safe-Bugula komini kɔno. A be musokulu min pɛmogoya la, u be k'u feliya sanni tile ka gan, min b'a to u na se ka situlu caman bo. U denw be kasi la, u mako t'o la. Konɔmankan gannen be fana, u mako t'o si na. Fen min b'u jenaje, o y'u ka baara dɔrɔn ye. O ka se ka nɔsɔrɔ. Tɔgo dumanba be nin muso ninnu na situloko la. Nka situlu te sɔrɔ musalaha la de. A baara ka jugu, o ye juguya dan ye. U mana situlubɔ damine, hali u t'u ka dukɔnɔbaaraw masɔrɔ a konɔna na. O de koson denw be to u yerema ten, u n'u baw te sɔrɔ fan kelen fe. Mogo dɔw b'a fo ko kasa be situlu la; nka a nafa ka bon kosebe dumuniko la. A munni fana ka pin farikolo ma. Kerenkerennenya la muso jigin-nen kura, situlu munni b'o fari-kolo sebekɔrɔ nugu, ka nɔrɔ di a ma. A b'a sin fana fa, den ka balo ka je.

Ka da nin nafaw kan situlu la, munnituludilannaw be situlu labaara kosebe. O de la situlu be sɔrɔ tulu muta caman na. Safe-Bugula komini lakodɔnnen be ni situlu juman ye. Bugula ye komini faaba ye, Kati mara la. Komini saba ninnu be danbo; n'o ye Safe-Bugula, Sanankɔrɔba ani Jalakɔrɔba ye. Bugula ni Bamako ce ye km60 nɔgonna ye. Koperatifu Sinsinbere tɔndew be bo komini saba ninnu kɔno.

Nin don sɔgɔma, Fatumata n'a jenɔgonw tun be kɔlɔgozi la. U ni kɔlodoro min bɔra silikeyɔrɔ la, o tun ye kg200 ye. U y'a tila bapanwari saba ce, k'u doni u kun na ka bɔ mansinda la, ka kɔlɔgosiyɔrɔ segere, ka na minenw falen sɔrɔ ji la u ne. U ye ji k'u la k'u gosili damine. Mogo si te kuma masɔrɔ bilen baara fe. Musokulu bee b'i son a ta la; mogo si t'a fe tow ka kɔlo ka je i ta ne. U be to ka ji k'u kun; o b'a magaya k'a jeli sennateliya. Kɔlɔ be gosi ni tege ye. Ni kɔlɔgosiminen ka bon, muso fila fo saba b'a bolo don a la k'a gosi nɔgon fe. U be to k'a bɔ nɔgon kɔrɔ ni jama ka ca. Sanni minnu tege ka don a la, olu ni musokɔrɔbaw be dɔnkili da, ka tegere diya baarakelaw kun. Ni

min ka kɔlɔ gosira k'a bubun bɔ, u b'o saalo ka bo kɔlodoro kunna, ka ke minen were kɔno. Kɔlɔ kanga de be wele bunbun. Minenw mana fa bunbun na, u be taa olu bɔn dingeba senninen dɔ kɔno u kɔfe.

Bugula ye situlu juman sɔrɔyɔrɔ ye. I sijne folɔ Bugula, n'i ne cunna dugu kan, a be k'i nena ko mogo t'a kɔno. Tuma dɔw la i be ce damadaw sɔrɔ baro la gelew kan. I be denmisennin dɔw fana ye tulonkew la yɔrɔw la. Muso dɔw yere be ye susuliw la duw kɔno. Nka mogo be min ye ka lasa kosebe Bugula, o ye kɔlotɔn, kɔlɔboorow (n'o ye kɔlɔ gosilen jagaw ye), ka fala situlukasa kan, o b'i kunben bɔlɔn bɔe kɔno. Sunkura ni Fatu, olu denw tun bamunen b'u kɔ la; wa u kera muso folɔ ye ka tila u ka kɔlɔ gosili la. U labanna k'u bolo bila muso tɔw kun k'u demen u ta la. Ni kɔlɔ minnu gosira ka je, u b'o bo ka ke minenbaw kɔno, k'u sigi yɔrɔ lasagonnennagɔngɔn t'u sɔrɔ yɔrɔ min na lere kelen kuntaala, u ka basigi, walima ka nɔmajɔ. O furance kɔno musow b'u segenafajie bɔ, ani ka sin di u denw ma. Fatumata Sako be tasuma mene o waati la. U be baramaba n'a datulan, ani daga-lamaga kutu janba ko ka je. Daga be sigi tasuma kan, ka kɔlodège nɔmajɔlen tige ka bila a kɔno, k'a tobi. Situlubɔ baara ka jugu a nafa ma. Bololatulubɔ segen ka bon kosebe. U be tulu hake min sɔrɔ, o feerelen te hali u ka musakaninw bɔ.

Koperatifu Sinsinbere be tulu suguya fila dilan. Min ye situlu juman ye, o ye koperatifu ta ye; min je man pin kosebe, o ye musow yere ta ye. O mana tila u ce, bee b'i tak'i mako ye. Ka koperatifu ta bee feere a ka situlupininnaw ma. Fatumata Sako si hake san 30 ni kɔ la. A ka fo la, u be situlu bo wajibi la; sabula layidu b'u ni u ka sannikelaw ce. U t'a fe olu ka fo u jigi kɔ. A filanan, musow mako misennin dɔw be jenabɔ u ka tuluw la, kasɔrɔ o ma ke ni sanni ye. O y'a nafa do ye. Sunkura ko tulu min be tila musow ce, u b'o kg1 feere sefawari d70 fo ka se d120 ma. O songo be jigin ka yelen, ka kejɛ ni san waatiw ye. A ko fobɔnda waati la situlu te war i jenama sɔrɔ; ka da a kan o b'a sɔrɔ a be muso bee bolo wula

kɔno. Sannikelaw fana te war i caman don a la; u b'a san da su la. Sunkura ni Fatumata y'u ta baro fe, fo ka jine Sako kɔ. U wulila ka taa o demen situlutobi la ga kɔrɔ. O gaba min jolen be yen, u be baa-ra k'o jukɔrɔ. Tile to be k'o la. U be kɔlodège tobi, fo k'u tulu bɔ. Ni daga min dalajigginna, u be dɔ tige ka fala o konota kan ni hakilisigi ye. Tulu gonin kana pan ka k'u kan. N'i sinna ka daga fa kɔlodège la, a be furufuru ka bɔn joona. O ye tjeni ye. A be baara fana sennasumaya.

Fatumata ka fo la, sumaya man nin kɔlɔbaara la. O de la a b'a fo u k'a ke ni basigi ye. O n'a ta bee, a b'a godo musow kɔ u k'u sennateliya u ka ketaw fe, min b'a to u be se ka tila pewu ka kɔn fitiri je. Koperatifu Sinsinbere kuntigi ye Koyan Bagayɔkɔ ye ka bo Ferentumun, Jalakɔrɔba komini na. A delila ka ke konseye ye u ka meri la ka temen politikiton URD tɔgo la.

Sinsinbere tɔnden ka ca muso 300 ye ka bo dugu 15 kɔno. Koyan Bagayɔkɔ be san caman bo koperatifu in kunna. A be kunnafoni-diwi ni lafaamuyaliw ke lakɔliw la, ani ka Sinsinbere ka baara mankutu kunnafonidilaw ye. Koyan ye mogo lakodɔnnnenba ye Sinsinbere kɔno ani sigida n'a lamini na. N'o ye komini saba minnu kofora sanfe. Nin ntendend in na, an nana Koyan sigilen sɔrɔ ga jukɔrɔ. A wɔsilen debedebe i ko ntorijeninna. Fatumata ni Sunkura tun b'a la ka nɔgon labi kanga celi la ka bo tulu tobito kunna. O bee la, u be segen; fo Koyan ni Mayimuna Samake be to ka demen don u la. Ale Koyan ni Mayimuna fila bee be bo Jalakɔrɔba komini na. Ni situlubɔ be yen waati min na, u bena Bugula ka to yen fo tile 4 kuntaala. Koperatifuden to bee b'o cogo la. Nin don, u tun b'u tile filanan na. Don folɔ la, u be sikɔlɔ ko ka da tile la. Min manna ja, u b'u woloma ka jugumanw bɔ a la. Tile filanan ye kɔlɔ sili, a gosili, ani kɔlodège tobili ye k'a tulu bɔ. Tile sabanan u be tuluijiw soli ka ke manapalanninw kɔno, minnu ye kilo kelen-kelen hakew ye. Koyan demenbaa ye Mayimuna Samake ye; ale ye Sinsinbere kɛsutigi ye. Kabini san 2007, u be nin jɔyɔrɔ ninnu na, kalosara t'u ye. Ferentumun ni Bugula ce be se km20 ni kɔ ma. Tuma dɔw la, ni Koyan ma bilabaa sɔrɔ moto la, walima ni mɔbilitasara t'a bolo, a be taa ka laban ka segin a sen na. Furance in ye lere 8 taama ye mɔgɔkɔrɔba bolo. Waati dɔw la k'a ta tile 15 la fo 20, a b'o ke Bugula situluko kunkɔrɔ. A ko n'i kera jamajɛmɔgɔ ye, wajibi ye timinandiya ye.

Koyan hamu ye koperatifu Sinsinbere demenbaaw k'u bolomagen halibi, min b'a to u ka se ka senefen dɔw bayelema; i n'a fo tiga. Ka tigasene yiriwa fo ka se a bayelemani baaraw ma. O waleyaw be musow ka senyerɛkɔrɔ

sabati ka taa a fe. Koperatifu Sinsinbere yere sigira senkan ni demendonjekulu « Mali Folk-center jetaa » ka demen ye. O ye baarakemin en kun folɔw di; n'o ye silikemansin, kɔlɔ gosilanw, jibondo, ka baarakayɔrɔ laben ani ka musow kalan u ka baaraw kecogo juman na. O y'a to u sera ka situlu juman caman sɔrɔ ka temen u ka baara daminewaati kan.

Koyan Bagayɔkɔ ka fo la, hali bolofenjirakenew kan, jama be girin Sinsinbere ka situlu kan. Sabula a dilancogo ka pin, a lasa-goncogo fana ka pin. N'olu ta ma san ka ban, mɔgɔ were ta pininkali te ke. Sinsinbere be situlu tɔni 4 fo 5 dilan san o san. O sɔrɔ 80% be bakurufaseere, a to 20% be dɔgɔdɔgoninfeere. Situlu kg1 sefawari d240, o de sigilen don Sinsinbere n'a ka bakurubasannaw ce. Mayimuna Samake y'a jira k'o songo in sebekɔrɔ jaasilen don, n'i y'a sanga olu ka segen ma baara in na. A k'u te tɔnɔ bere sɔrɔ. U kɔni be baara ke su ni tile bee; nka a nafaba t'u kan. U b'u timinandiya, koperatifu kana bin. A ko hali olu minnu ye tɔnpemɔgɔw ye, ladiyaliwari sigilen t'u ye. Koyan ka fo la, ni samiye surunyana, koperatifu be juru don tɔndenw na, walasa u ka se k'u ka senebɛ; nka o juru ninnu be sara ni sikɔlɔ ye. Juru srawaati mana a sɔrɔ sikɔlɔ kg1 be dɔrɔme hake min na, tɔn b'a mine u bolo o de la.

Mayimuna Samake y'a jira ko songo min sigilen don koperatifu ni a ka sannikelaw ce folɔ, o ye kg1 240 ye. O la a hami ye dɔ ka se ka fala o kan, min b'a to u ka segen bala se k'u nafa. An be waati min na, koperatifu Sinsinbere ka situlu be taa Faransi, Fenlandi ani Lamerikenjamana na.

Ne b'aw ladonniya, ko ne yere ye koperatifu Sinsinbere biromɔgɔw kalan u jɔyɔrɔ dɔnni, an'u ka ketaw faamuyako juman na sa 2008 konɔna na. O kɔfe san 2013 ka se 2016 ma, n ye musotɔnba sigi Jalakɔrɔba komini dugu bee kɔno, ka laban k'o tɔnw bolo don nɔgon bolo ka ke « erezo » ye komini tɔgo la, k'o biroba mɔgɔw fana kalan u ka baaraw la. O poroze lapinin tun ye ka kunnafonidilaw ni lafaamuyaliw ani damakasiliw ke duguw kɔno, ani meriw la, min b'a to u ka son musow ka don politiki la, muso hake ka se ka caya konseyeya la. O waati y'a sɔrɔ Koyan Bagayɔkɔ ye konseye ye Jalakɔrɔba meri la politikiton URD tɔgo la. Nka san 2016 konseyesigi kalataw nekɔrɔ, politikiton ADEMA mɔgɔw y'a negen ka fala u kan; Sabula musokuntigi don, walasa olu na se ka jama fanba sɔrɔ kalata la, ka meri mine URD la. An ka nsana do b'a fo ko nata be wulu dakala janya. Ala y'a ke ADEMA jɔsen ma se ka nkoolo faga. Koyan ma konseye sɔrɔ tuguni; nka caman kɔni sera ka fala muso hake kan meri la ne ka wulikajɔ sababu la.

Dəkala Yuşufu Jara

Metewo ko san 2020 samiyε bε sɔn ka don joona

Mali jiko ni fipéko jatemine cakéda, n'o ye metewo ye, o y'a jira ko pinan samiyε be sɔn ka don joona, ani ka meen k'a sɔrɔ sanji ma tige, walima ka tige a tigewaati kɔrɔ la. Nka a ko tilejɔ kuntaala surun fana be se ka ke samiyε damine an'a banwaatiyanfan fe. Sanji be se ka caya kosebe walima k'a bere ben Bajoliba ni Senegali Ba falaw kɔnɔ.

Kunnafoñi kelen in y'a jira, ko sanji hake sɔrɔtaw san 2020 mekalo ni zuwenkalo ani zuluyekalo kɔnɔ, k'o be sɔn ka caya, walima ka ben ni san 1981 ani san 2010 sanji sɔrɔlenw hake ye o waati kelen na jamana fan bee fe, fo n'a kera Sikaso mara, ani San ni Moti serekiliw ye. O y'oro ninnu na sanji sɔrɔta hake be sɔn ka caya kosebe ka temen u ka sanji sɔrɔta hake kɔrɔ kan.

Fen min ye zuwenkalo ni zuluyekalo ani utikalo ye, san 2020 sanji hake sɔrɔta be se ka caya walima ka ben ni san 1981 ani 2010 sanji hake sɔrɔlew ye o waati kelen na Kayi, Nɔrɔn, Kulukɔrɔ, Dɔyila, Sikaso, Segu ani Moti maraw, ka fara Tumutu ni Gawo ani Menaka maraw woroduguyanfan kan. Sanji hake sɔrɔta o waati kelen na Kidali ni Tawudeni maraw kɔnɔ, ani Tumutu ni Menaka maraw keñekayanfan fe, o be sɔn ka ben san 1981 ani 2010 ta hake ma.

Fen min ye zuluyekalo ni utikalo ani setanburukalo sanji hake sɔrɔta ye san 2020 kɔnɔ, o be sɔn ka caya kosebe, walima ka ben ni san 1981 ani 2010 sanji hake ye o waati kelen na Kayi, Nɔrɔn, Kulukɔrɔ, Dɔyila, Sikaso, Segu, ani Moti maraw kɔnɔ, ka fara Tumutu ni Gawo ani Menaka maraw woroduguyanfan kan.

O de la metewo ko samiyε be sɔn ka kɔn ka don joona, walima ka don a waati kɔrɔ la Kulukɔrɔ,

Sikaso, Segu, Moti ani Menaka maraw kɔnɔ, ka fara Tumutu ni Gawo maraw woroduguyanfan ni Nɔrɔn serekili kan.

Samiye be se ka don a donwaati kɔrɔ la Kayi, Kidali, ani Tawudeni maraw kɔnɔ, fo n'a bɔra Nɔrɔn serekili la, ani Tumutu ni Gawo maraw keñekayanfan.

San 2020 samiyε be sɔn ka meen k'a sɔrɔ a ma tige Moti ni Menaka maraw kɔnɔ; fo n'a bɔra Yuwaru serekili la. A te kɔn ka tige Sikaso, Kulukɔrɔ, ani Segu maraw woroduguyanfan ka digi kɔrɔn kan, ka fara Tumutu ni Gawo maraw woroduguyanfan kan. A be se ka tige a tigewaati kɔrɔ la jamana fan tɔw fe.

Samiye daminena na, tilejɔ bena ke; nka a kuntaala tena janya Menaka mara, Segu ani Moti maraw keñekayanfan, ahi Tumutu mara woroduguyanfan fe ka digi kɔrɔn kan, ani Gawo mara woroduguyanfan. Nka a be se ka tige a tigewaati kɔrɔ la jamana fan tɔw fe.

Tilejɔ min be ke samiyε bantuma na, o kuntaala tena janya, walima ka dan hake la jamana fan bee fe. Walasa ka mɔgɔw tanga samiyε galεya dɔw ma, i n'a fɔ jikaa



Dugubaw kɔnɔ, musodenkundi ye pari cedon ye denkuranintigiw fe

An be don min na lagosi min be da musow kan dansagonkokew la u ka denkundikenew kan, dan t'ɔ la. Muso dɔw be don da jugu bee fe, walasa u na se k'u ka denkundifen sɔrɔ ka di kene kan. O de kson sisan, nemajo be ka don a cogoya la. Caman b'a la ka bɔ a dansagonkokew la. N'o te denkundi dɔnw tuŋ mana se, o tun ye wasobaanciyakene sigilen ye muso dɔw fe. O donw na, u yere ka fen, faantan ni mone. Ni muso min ma se ka denkundifen sɔrɔ, kene lasoroli tun ye moromoroli dan bee y'o bolo. Sisan nɔgɔya be ka don kow kecogo la. Musodenkundi be ka dɔgɔya. A dan ye sɔgɔmata dɔrɔn ye. Caman be ka wulafeta bɔ a la. Hali o cedenkundi fana na, kafeba wulili ani ka soba tobi ka sogo walima sisesogo k'a la, o be ka dɔgɔya. Nin taabolo in bennen be ce caman ma bi. Sisan, sa mana bɔ ka bere min to i bolo, i b'a bugo n'o ye. Nin kera ce dutigi dɔ ye, den 4 b'ale bolo. A ko ale den kɔsa togo welela misiri la fajiriseli jiginnen. Tuma min na ale seginna ka ba seliyɔrɔ la, a muso k'a ma ko denkundi banna, ko musodenkundi te yen bilen. Wa ko fo ka min ke sa, denkundi fila tena ke so in kɔnɔ yan tuguni. A k'o ye diyali min k'ale ye, o te dɔɔnin ye. Ka da a kan ale muso tun mana jigin tuma o tuma, ale tun te fosi jɔrɔ denkundi musakako ko. Den saba fɔlɔ bee kundi kera galεya kɔnɔ, ka da u musaka caya kan. Sogomada tun ye wariba bɔli ye, wulada fana tun ye wariba bɔli ye. Ce in ko, ale t'a dɔn kun jumen na depitew te sariya ta, ka waritjepko jugu dabila denkundi la ani kɔnɔ na? Musow yere k'u ye hakili numan sɔrɔ, ka warikogeleya dɔn. O de koson u k'u ye yelema numan don u taabolo la. Sabula tilew te kelen ye. Dugubaw sigili galεya k'a sababu ke warikogeleya ye; kerenerrennya la Bamako. O nana ni dubaw dɔgɔyali ye. Ce kelen den bee be ka duba bila ka k'u damana du ye duba sɔrɔ dɔgɔya koson, k'u jilaja n'u muso n'u denw dɔrɔn ye. An be don min na musow b'a la k'u yerejini denkundiko la. Sigidaw ka jan pɔgon na. A dun te ku muso si la i bololankolon ka se a kene kan. A wajibiyen don i ni denkundifen dɔ ka na, jama je be wasa min na. Denkundi yentama ye

Madamu Sisoko ye muso ye, min ye filaninw sɔrɔ kɔsa in na. A ko

saaraw, banaw, tilejɔ degun ani balodese kɔlɔlo jugu ma, u kana sene ke ka jigin folondingew kɔnɔ. Senefen minnu te se ka ji ku kosebe u kana olu fana dan jisigiyɔrɔw la. U ka forow kɔlɔsi ntɔnw ni tijenikefen tɔw la. N'u ye tijenikefenw kɔlɔsi, fanga tigilamɔgɔ minnu ka baara ye tijenikefenw keleli ye, u k'o kunnafoni lase olu ma joona.

**Makan Sisoko
Dokala Yusufu Jara**

bolo. O sarali ye wajibi ye a mɔgɔ kelenna ye don nataw la. Madamu Sisoko ni Madamu Konare be to ka don duw kɔnɔ u ka sigida la, ka kunnafonidiw ni lafaamuya-liw ke musodenkundi dabilaliko la. Madamu Jara ye geleya min ye a je na a ka den fɔlɔ kundili la, o k'ale tena a jɔgɔnna dɔgɔ jugu jo tuguni. Ka da a kan a ma musodenkundi jɔgɔnna wari buruja ye musow fe. A be dutigice ni gadonmuso caman coron. O donw yere la jelimuso ju-guw kewale jugu be sinamusow bila jɔgɔn na.

Nin kera muso masumanen dɔ ye, min ye kɔnɔne naani ke. O k'ale den naaninan in kundili la, ale sinamuso nana ni jelimuso dɔ ye. K'o y'ale tigelima kosebe, fo musojama min tun be kene kan, olu y'a dɔn k'a kan be ale ma. O de koson ale temusodenkundi fe bilen. U muso dama kewale jugu ye ko caman negebo u yere la. Musow ka jɔgɔnlagosi ye taa ka segin ye. I mana dɔ fo dɔ ma bi o ka kene kan, o b'i kɔnɔ kene were kan k'a ta juru sara i la. Nafa fosi t'o la hadamadenya tijeni kɔ musow ni jɔgɔn ce. Madamu Kulubali Hawa ko musodenkundi ma se ka diya ale yetile kelen. Ka da a kan k'a tijeni ka bon n'a nafa ye. Tuma min na ale y'a den fɔlɔ sɔrɔ, a y'a can k'a jo, ko musodenkundi te k'a la. A k'a teriw n'a balimamusow y'ale deli ka dese, a ma sɔn ka don a dafe abada. A k'u b'i negen ka don a dafe, nka k'i te mɔgɔ si sɔrɔ u la, min b'i deme a musakako la.

Madamu Kulubali Hawa ka jatemine na, musodenkundi hake min sigira ka wuli here la o ma caya. O de y'ale siran a je ka taa a fe. Balimamuso dɔw be denkundikenew jatemine, ka dimi don jɔgɔn na. A dɔw la fo u tege be se jɔgɔn ma. O de la ale y'i kali kabini o don, ko n'a le furula ka den sɔrɔ, musodenkundi te k'o la. A ko Alla y'ale kundiya, a furula ka denmusonin sɔrɔ. A k'a ce ma ko musodenkundi kana k'a la. A ce sɔnna o ma.

Muso dɔ fana be yen, min ce be negekurunta ke. O k'olu ye feere dɔ sɔrɔ musojama dalajeli la u bara, ko denkundi. A k'ale jigin o jigin, a ce n'a teriw bina negekurunta la u ka du kɔnɔ. O de la olu te dɔwre ke cedenkundi ko.

**Aminata Dindi Sisoko
Dokala Yusufu Jara**

Segen dan bee ye Erelaw ta ye an sigidaw la

Ne nisondiyalen be nin batakiin ci Kibaru la, ka foli ke a baarakelaw ani Arajomali baarakelaw ye.

Erelaw ye mogo sugandilenw ye duguw kono, minnu be degotorew deme u ka baaraw la. U be furakisediw ke n'o waa-tiw scra, u be kunnafonidiw ni lafaamuyaliw fana ke degotoreso sirataamani na dugudenw fe. U be muso jiginni kura n'u denyereninw bugunnatigew ta, den ka wolosebenko la. Ne b'a jini jamana nemogow

fe, uk'u hakili to Erelaw la. Ka da a kan anw Erelaw kelen be degesusukolankalan ye. An da jelen don, nka fen t'an kono. Ne be min fo kenya minisirisi ye, u ka hakiljakabu ke, ka Erelaw ka geleyaw laje. Sabula Erelaw daw segennen don kojugu. Jamana nemogow k'a laje, Erelaw doni kana to ASAKO doron kun. A donnen don, ko jaabi juman soro Erelew ka baaraw la u ka duguw kono. O b'a jira ko joyorba b'an na kenya sabatili ani hadamadenya seben nafama caman soro la mogow ka fasode-

nya waleyali siratige la. Nka an te k'an ka baara nafa soro. Geleya min b'an kan, o dogolen te mogo si la.

A kono be fo an ye tuma bee la, ko sara te Erelaw ye, nka ko ladiyalisen be se ka di a ma, a joyoro kama dugu kono, u ka sigida ASAKO fe. Su fara tile kan anw be wulikajo la an ka duguw kono mogow nofe, u ka se ka kenya sabatiliwalew matarafa. An b'an yere ka baaraw dabila waati caman na, ka jama sago ke. O caman na, an yere makobesa, demebaa te soro an na. Bee hakili la ko ASAKO de

jolen be n'an ye dije ko bee la. A be mogo daw yere jena, ko Erelaw ye kalosaratalaw ye. Ala k'an to sutura la. Erelaw nafa yera dugu caman kono.

O tuma na jamana nemogow k'a ko laje ni hakili juman ye, min b'a to an fana mako ka se kane tow kerefe. An ka nsana do b'a fo ko, bolokonnin kelen te bele ta. Nka n'u farala pogon kan, u b'a ta. Siga fosi t'o la.


**Aba Bari ka bo Banga,
Sibila komini na Segu**

Mali be geloya danteme kono

Fasoden juguw kelen be ka marifa ta, k'u faso kele. Ne ma nin pogonna fasodenjuguyawale ye. Ima se k'i faso demen k'a bo nogo la, fo ka marifa ta k'i b'o ci i kelen ka nafa kama. A ko selen be yoro min ma sisan, faamaw ka kan ka kuma jamanaden tow ye ka jeya. U ka jefoli k'an ye.

A juman ye an ka wuli k'an bolo di pogon ma, walasa faso ka se ka bo nin dabolo jugu in kan. Jamana te se ka bo bolo la jamadanew yere ka wulikajo k'o. Mogow segenna, u janina. Mogow si te hine jama sanba la, fo u yere nafa jininni. Banbaanciw b'an kan, an yere dama fana te pogon to yen. O b'a jira ko do be kala fan min fe, do fana b'a la ka boro fan do fe. An ka nsana do b'a fo, ko "an" ye n demen n ka wara la, o b'a soro a kunkolo b'i yere bolo".

Wa "bijekalajininna sen dalen bijekala kan, o bije ye man di". U ko fana "n'i ye ba ye ka ba bin, do ko be demen na". Dugawu be don sanga ni waati bee la, ko Ala kana an ke jugu sago ye. Nka n'an ma wuli an wulituma na, k'an bolo di pogon ma ka yerenafajinin dabilla, jamana te yen tuguni de. Mogow jugu mana k'i soronadonbaa ye, o ye si binnen y'a tomominen kono. Tunin bee te mogow banakotaayoro ye; dunan fora a jatigi k'o, o kera Mali ta ye. An yere dama te ka ben. An jigesemenjiri karila; Sabula a b'i na fo minnu nanen b'anw demen, olu t'an ka jamana sumani fe. Ne yere ma da jahadikelako la; a bee ye banbaanciw ni marifasecerlaw ani dorgufeerelaw kewale jugu ye ka nesin Mali ma. Mogow caman be yen bi, dunan ni dugulen na,



olu hamte jamana sumani ye sis-an. Sabula olu b'u ka nafa soro a sorobanagami kono.

Ni jamanadenw y'u bolo di pogon ma, ka don da kelen fe, ka bo da kelen fe, a ka ca a la jamana in be

segin a yere ma.

**Isa Jalo ka bo Kedugu,
Dugabugu komini na, Kati**

Mali koorisene daminena Ofisidinizeri kono

Ne nisondiyalen be nin bataki in ci Kibaru la ka faransasiya do di. An balimake Faraban Balo y'a jira a ka bataki do la, ko Mali koorisene daminena Kucala serekili kono. Ne hakili la o ye fili ye. Mali koorisene daminena Segu mara la Ofisidinizeri kono; kerengerenneya la jonen serekili la. O waatiw la koori tun be sene tilema fe, ka bajji walangata ka don a forow koro. Kabini tilema fe

tarakiteriw tun be ntugun janbaw wuli koori be dan minnu kan. Jibolisiraw tun be ben ntugunwelenw ma; n'o ye ntugunfurancew ye. Ntugun kelen o kelen kuntaala tun ye m100 ye. A ka doko kamalenkoru la, min kelen tun be se ka koortitungun kelen koroziyen tile kono.

Ni mogow min ka duden tun ye mogow 10 ye, foro taari 10 be laben o ye. Nka abada faamaw tun te son mogow si ka koortiforo ka bonya n'i

ka malosoro ye. N'i ka malosoro kera taari 7,5 ye, i ka koortiforo be ke taari 2,5 ye. Halibi a b'o cogo la faamaw bolo. Semudete te son ka mogow si ka koortiforo bonya n'a ka kabaforo ye. Senekelaw yere de be do bo u ka kabaforow la ka fara u ka koortiforow kan. U b'o ke warikonata de kama; walasa u na se ka wara caman soro koori la. O te goferenaman no ye.

**Bakari Danbeli ka
bo Sikaso Wayeremade la**

Poyi : Saya te tago dun

Kunun temena, bi sera. Kaburuw fara, taa-siw dogoyara. Danbe dogoyara.

Ee, n balimaw, bi ma dije da. Biton, Segukoro disiba; Babenba, Sikaso dan kelen; Samori, Wasolon ceba; Jose, Beledugu kan kelen. Olu ye dije ta a kunce ma, K'a finiforo, k'a baraforo, K'a funun i ko kote, K'a pogirin i ko sungurun sin. Tura kelen sinsan faw; Olu taara minni?

Fadenw kuncema sumuniw, Olu taara minni? U sara; nka u ma malo. Mansa bee n'a tile don; Olu ka waati tun ye disi ye. Anw ta, ko k'o ke feere ye. O feere do y'an ka kan kalanni ye. An k'an jilaja; Hali n'a ma se k'u pogonna bo, An fana k'an tile ko ke. Saya te tago dun.

**Yasa Tarawele Segu
« ASAKO Iniwirisiteri »
jenabeklikulu kuntigi don,
Sagabala komini na Kolkanan**

Ni mugu cira bolibaatow ne, nemogow be ke komcogo ye



Kibarukalannaw ka lajini ye fasokanw yiriwali ye Mali kono, ka teme kan sure were kan. An tena se ka to tubabuw bolo nin cogo la tan. San o san jamana nemogow be laselibaw ke, ko fasokanw bena don ba la jamana kono, ka baaa ke n'u ye. Nka o be dan san o san kumabafu dama ma; a waleya te ye.

Jamanadenw ka kan ka waso n'u ka kanw yiriwali ye. N'an ko an b'an kunkolo falen mogow were kunkolo la, an be

ke donbagalafili ye. Jamana nemogow te nin don kojugu ye folo, fo tubabu mana a bolo purutu ka bo an bolo tuma minna. An be soro k'a fo ko an b'an nesin an ka kanw kalanni ma. O b'a soro dije kun tununna anna; Sabula dije taalen don k'an to kaban.

Walidumuni mana diya mogow da cogo o cogo, a t'i yere ka dumuni tobilen bo abada. N'i ye mogow were fisaya n'i yere ye, i be ke a ka jon ye siga fosi t'o la. Mali kono bi, Kibarukalannaw jatelen be naloma kodonbaliw

ye. U ka kalan jatelen te jamana nemogow fe. Malidenw segenna u janina tubabukan kalanbaaw bolo. Faso nafolo dunni, nama-ra ani kiiriw tigecogo jugu; anw b'an ka kalanbaaw lako don n'o dama ye. N'o te jamana netasira den kelen t'u koro. An kono be kufetaa la; nka n'an tununna, an be segin an k'o. Don ka jan, nka don sebali te. Farafin b'a yere negen. Dije be yeredonnaw bolo.

**Faraban Balo ka bo
Fuladugu-Kotuba,
Kita mara la**

Mali kɔɔrisene yiriwali cakeda (CMDT): Dɔɔnin farala kɔɔri sɔŋɔ kan

Mali kɔɔrisene yiriwali cakeda , n'o ye Semudete ye, o y'a jira ko kɔɔri bena mine senekelaw bolo pinan sefawari d43 la. O ye d3 faralalen ye hake kɔɔl fɔlén kan, n'o tun ye d40 ye. Mun y'o ke ? Goferenaman de y'a yaniya ka temen ni demen donni ye kɔɔrisene ma.

San o san sanni ka sene kanpanji damine, kɔɔri bena san da min na, o be fo senekelaw ye. O siratige la, Semudete ni goferenaman ka benkan kɔɔ, u ye kɔɔri sɔŋɔ sigi. O sɔŋɔ in be boli Otiwale kɔɔrisenenaw fana kan. Kɔɔri sɔŋɔ sigira cogo min na ninan, walasa k'o nɛfø senekelaw ye, Semudete nɛmogoba Baba Bereye taama ke kɔɔrisenemara bee kɔɔ k'a damine mekalo tile 8 na ka se a tile 17 ma san 2020. A ni Semudete ka baaraw feeretigiw ni Mali kɔɔrisenenaw ka lafasalitonba mɔgɔ dɔw tun be nɔgon fe kunnafoniditaama in na. Fen min ye san 2020/2021 sene kanpanji sene kefenw fansela ye, u ye jatemine ke taama in senfe, n'a y'a soro olu scelen be senekejekuluw ma.

Waati temenna, a tun fɔra ko kɔɔri be mine senekelaw bolo san 2020/2021 sene kanpanji na kg1 sefawari d40 na ; kasoro kanpanji temennen na, a minena u bolo kg1 d55 la. O tun b'a jira k'u be bɔne d15 la. Nka Semudete ni goferenaman ka bolodijñogonma kɔɔ, u benna ko la. U benna a kan, demen min be di angereko la, k'o bo a ma, k'a fara kɔɔri kg1 sɔŋɔ kan. U ko fen min ye kɔɔri sɔŋɔ jaasi nin cogo la, k'o de ye a sɔŋɔ binniba fana ye dije suguba la. U ko nin bee sababu ye koronawirisi kɔlɔl ye. U ko kɔɔri sɔŋɔ tun ma deli ka nin nɔgonna binniba ke kabini san 2009 ni ninan ce. A sɔŋɔ ye jiginni damine kabini awirilikalo temennen in na; Sabula ko finidilan iziniw te ka baara penama ke sisani ; kerenerenneny la Azi gun kan. Taji sɔŋɔ fana binni kɔlɔl yelenne be kɔɔri sɔŋɔko la. Baba Bereye ka fo la, geleyaba be Mali kɔɔ, k'a sababu ke basigibaliya min fanga ka bon jamana kɔɔnyanfan an'a cemanceyanfan fe. O be ka jamana ka soro hake dɔgoya o yɔrɔ ninnu na ; ka da a kan lenpo te ka sara yen fɔlɔ. Faso waganteba dun be labalo ni lenpow ni takisi sarataw ye. Walasa ka lakanan sabati yɔrɔ kofolen ninnu na, musaka caman b'a la ka taa o dafe. A mɔgɔko n'a musakababo fanga ka bon kosebe. Ni geleya fanga ka bon jamana kan, a numan ye an k'a ko nejinin ji nɛmajɔlen na nɔgon fe. O dabali tigelen dɔ kera demen donni ye angereko la goferenaman fe. O de koson a be san damadɔ bo, goferenaman cesirilen don o walya in tiimeni fe. Semudete nɛmogoba ka fo la, geleya be goferenaman ka demenko la sisani ka nesin dugukolo nasabɔba raw ma. Sabula fen minnu be ka di senekelaw ma nogoya la, o jruw te ka sara a nema, wa a caman te ka labara a fɔcogo la. Fɔcogo were la, u be ka don da werew fe. Geleya dɔ fana ye koronawiriski ye dije kɔɔ sisani. N'a fɔra jamana k'a disi da o bana in kumbenni, ani basigi sabatili la nɔgon fe, o te ko dennin ye. A be ninin senekelaw de fe, u ka ke hakilitigi ye, ka jamana nɛmogow makoto, ka da ko n'a kɔɔ kan. Ani k'a ninin Semudete ni Otiwale kɔɔrisenenaw fe, u ka dusu ta halibi, kɔɔriko ka to sira numan kan.

Baba Berete ka fo la, walasa ka lafiya soro geleya dɔw la halibi, demenwari



min tun be don angereko dafe, o be yelema ka nesin kɔɔri sɔŋɔ ma. A be fara o kan. Goferenaman ye sefawari miliyari 10 min di Semudete ma ninan angereko kama, mi nb'a to kɔɔri toni 700.000 ka se ka soro, jatebolaw y'a jiri ko n'i y'o tila

kɔɔrisenena jateminenew ce, bee niyɔrɔ be se sefawari d3 ma kɔɔri kg1 na. O de la kɔɔri sɔŋɔ sera ka bila d43 la ninan ; n'o te kɔɔri sɔŋɔ be sigi san o san ka keje ni dije suguba hakilila ye. Mali kɔɔri te labaara jamana kɔɔ; fo a be ce

ka taa a feere kɔɔkan, wajibi don a sɔŋɔ b'i janfa san dɔw la.

Koronawirisi kɔlɔl, ka fara izinibatigw ni nɔgon ce sinayaw kan, kɔɔri sɔŋɔ binna po dije suguba la. O de kɔlɔl jugu yelenn file Afiriki kɔɔriw la. Senekelaw k'a dɔn, ko a geleya te Mali kelen kan; kɔɔrisenjamana bee y'a ta soro a la. O la an de be je k'an fanga ke kelen ye an ka lapinuw sabatili la. A be ninin kɔɔrisenenaw fe, u kana u bolo jigin. U kana fen bɔ u ka kene senetaw hake la nin kanpanji in geleya kama. U y'u kandili min ke k'u be kɔɔriko wuli k'a jo a sen kan, u k'u jilaja ka layidu in tiime. Sene kefenw sera senekejekuluw ma kaban ; Semudete nɛmogoba y'o foli ke. Semudete hamni ye ka senekelaw wasa. U mako be se fen o fen ma u ka baaraw sabatili la, k'o lase u ma. N'o ye angere, binsagalan, fɔnjenamafagalani ani senekeminew. Hakililajigin na, Mali kɔɔriforo mume be se taari 700.000 ma. O soro nafa be se mɔgɔ miliyon 3 hake fana ma jamana kɔɔ.

Anni Mari Keyita
Dokala Yusufu Jara

Maakɔɔbaro : Wagadu jamana mara

Gana mara walawalanni ka kɔɔ ni tubabutile ye. Wagadu jamana tun tilatilan don sigidaw ye, n'olu tun be jate marabolow ye. Sigidaw tun ye suguya fila ye.

Sigida dɔw nɛmogoya tun kalifalen don soninkedu dɔw la, minnu tun te Tunkaraw ye, nka u ka deme tun be se Kage Magan ma. O misali dɔw file :

Jara marabolo tun be Nakatclakaw bolo ; Jafunu fanga tun dilen don Dukurelakaw ma ; Jarisolakaw fana tun ye fangatigi dɔw ye.

Sigida werew tun be, minnu fanga tun be boli Tunkaralakaw fe. Bee ka mara tun be Kage Magan ka masaya



kɔɔ. Bee de tun be kelekecew bo, u be fara Kage Magan ka kelece fariw kan ka ke kelefanga kelen ye,

ce ba keme fila. Kele tun mana sidi kura min mine, fanga dɔ tun be to o sigida o bolo ka fara se dɔ kan. Cikanw :

1. Wagadu jamana mara nɛfø kumasen saba kɔɔ
2. Wagadu mara sigidaw suguya fila fo.
3. Dapew kɔɔ fo : tubabutile, cefarin, kelefanga, mara walawalanni.
4. Mankutulan kelen-kelen fara togo ninnu kelen-kelen kan: fanga, kele, sigida
5. Dapew siya fo: u (u be fara), keme (ce ba keme) dɔ (fara se dɔ kan)

Karamogɔ Daramani
Tarawela

Dije be dabolo jumen kan bi koronawirisi bolo ?

Hadamaden miliyari saba ni kɔ lasigilen don u ka so bi dije kono, ka da a kan u be dugu min kono, mɔgɔ te don yen, mɔgɔ te bɔ. Cakedaw, suguw, kalsow, farikoljenajekoyorow, nɛnajekesow, lotoliw, batokeyorow, ninnu bee datugulen don. Nin bee sababu ye koronawirisi ye. Dugu datugulen fɔlɔ kera Hubeyi ye, Siniwajamana kan, san 2020 zanwuyekalo la. Bana in daminena yen de. Dugu in fonini daminena kabini san 2020 marisikalo tile 25, o b'a jira ko bana in sera ka kele Siniwajamana kan. Bana in ye fnebane ye nk'a ka teli hali ni fne ye. Bi, dije jamana te, yen a ma se yɔrɔ min na. Ne tugu n'a yele ce, a be mɔgɔ bahu mine yɔrɔn kelen. Siniwa dɔgɔtɔrɔ fɔlɔ min ye kulekan bɔ ka bana in kofɔ, u y'o faga. O koson, bana in sidɔnni geleyara. Ni bana dun ma sidɔn, a kele man di. Fura jɔnjɔn ma soro a la fɔlɔ,

hali n'o y'a soro nininiw be senna. Faransi dɔgɔtɔrɔ do ye niwakiniji bayelema ka ke koronawirisi fura ye. O fura in ye mako je yɔrɔ caman nka bi dije keneyako tɔnba y'o lagosi, k'o ka dabila.

Dugu datuguli daminena Siniwajamana kan Hubeyi, bi o fonina. Itali jamana datugura kabini san 2020 marisikalo tile 9, bi, u be ka feerew tige k'a daye dɔɔnin-dɔɔnin. Alijamjamana ye fonini damine bawo ntolatannaw yamaruyara u ka ntolatani ke, nka mɔgɔ te taa u laje. Esipani datugura kabini marisikalo tile 15. Cekijamana ta kera marisikalo tile 16. Faransi, Banisirayila, Wenezuyela, olu datugura kabini marisikalo tile 17. Beliziki ta kera kalo tile 18.

Afiriki kɔɔ, Alizeri ni Afirikidisidi ta ka jugu kosebe ni tow ta ye. Afiriki jamana caman kɔɔ, datuguli, suseboli ni jelenya sariyaw ni gerefɔgonya sariyaw ni nu ni da datuguli sariyaw dantigera faamaw

fe nk'u labatoli kelen be geleya ye fan bee. Mali kɔɔ, gerefɔgoya sariyaw ma se ka labato a je ma, saniya sariyaw b'o cogo la ani nu ni da datuguli ni tege koli ni safune ni ji saniman ye.

Dije kɔɔ, koronawirisi ka mɔgɔ fagata ka ca jamana min kɔɔ kosebe, o ye Siniwajamana ye, ka Angilejamana da o kan, Berezili, Itali, Esipani, Irisijamana, Faransi. O jamana ninnu kɔɔ, fonini kera diyagoya ye bawo jamanadenw be jini ka dese.

Bana in ye dankarili min ke soro yi-riwali la, o jate te se ka mine sisani, nk'a ye digi ke kosebe jamanabaw la kuma te faantanjamanaaw ma.

Dijelaminibana kumbenni te tile kelen ko ye. Dɔgɔtɔrɔ mana min fo, faamaw mana min fo, an k'olu labato, o dɔrɔn de y'a fura ye sanni a ko ka nedɔn.

Mahamadu Kanta
Mori Kante

Sene soro yiriwali jateminfén kura bora, min be wele « E-Sene »

Cridinateri sen be baara tow kecogo juman na cogo min na, a joyoroba be sene soro yiriwali la ten. O temesira ye dugukolo suguya sidonni, suman suguya min fana be se ka ne o kan, an'o jiko n'a nogoko cogoya dönni. Sene be se ka k'o yoro in na waati minnu na, ani senefen mako be ji hake min na owaatiw la, k'o fana don sanni k'i ka baara damine. Nin feere kura in bena kunfebara dabila a nema sene na. Burehima Kulubali de ye o feere kura in sigibaa ye senkan Mali kono.

Burehima Kulubali ye kalanw ke Farsani orinateriko nedonni kan. A tilalen o kalanw na, orinaterilabaara cakeda folo min sigira senkan Farsani n'a be wele « CAPGEMINI », a ye baara ke yen. A ye faamuyaliba min soro yen, don do la a y'a sigi k'a miiri, ka nininkali saba k'a yere la. A ko mun de la denmisen tungafetaala beka caya Mali kono san o san ? Munna na Mali senekelaw te teme seneko kelen walima fila kan san kono ? Waatiyelema kolo jugu min be ka yelen sene na, munna feere kura te sigi senkan, min b'a to yelema juman ka se ka don senekelaw dabolo la. A ye naniya siri o yoro bee la, ka kosegin Mali kono k'a ka orinaterilabaara cakeda dayele Bamako, k'o wele tubabukan daje surun na « SATGRIE S.A », deme donni kama senekelaw la. A ye lozisiyeli kura min laben o hukumu kono, a y'o de togo da E-Sene ; tubabukan na a be seben « E-Sene ».

Mali ye senekelaw jamanaba ye. Funte ni ni nene befognon k'o, samiye ni tilema fana be fognon k'o. Mali samiye kuntaala b'a ta kalo 4 na ka sc 5 ma. O te se k'a to senekelaw ka wasaba soro senena san o san. Sabula u kasoro sirilen be samiye diya n'a goya la. Ni samiye banna, u be tilema kalo 8 walima 9 to bee ke jago misenni ni baganmara la. Keta were te denmisen minnu bolo, olu be tungafetaaminen siri ka taa u ta njenini fan werew fe. Mali denmisen 80% bee hamie tungafetaa ye fobonda fe.

Burehima Kulubali ka feere kura min dabolen be sene soro yiriwali kama, o ma bila senekela bee ka bolo kan folo. A be ka sifile Mali jirisienko n'a sumansiko cakeda Iyeyeri (IER) de kelen fe folo. Jaabi pumanw be ka soro la, Burehima Kulubali n'a jenogon b'a fe ka izini do dayele a ko netaa kama, ka lozisiyeli E-Sene in labugun kosebe. O la, u be soro k'a forobaya senekela caman be se k'a lasoro cogo min na. Lozisiyeli fila min dilanna ka di Iyeyeri ma, o kelen sifilela foro fila kono Bamako dafe. O foro kelen be Guwana, to kelen be Zugume.

Lozisiyeli E-Sene baarakecogo Burehima Kulubali ka fo la, E-Sene be baara ke cogoya fila la. Ni foro labennen b'i bolo jidonsene kama, i b'a ninik'o foro in dugukolo suguya don folo, ka soro ka ko to jatebo damine. Kunnafoniw soro, fen min ye foro jiko n'a nogoko kunnafonikow ye, i be soro k'olu fana sidonnanw turu-turu foro fanw fe. O fen turulen ninnu bee sun ye buwatiba kelen ye. Focogo were la, fen turulen bee k'a ka kunnafoni soro, lase buwatiba kelen ma. Buwatiba



bejisamanponpe tiyo la ji la. Ji te fen k'o la. O buwatiba be ji hake ni nogo hake kunnafoni minnu soro, o be soro ka yamaruya di jiponpe ma, o k'o fili ka taa foro kono. Lozisiyeli E-Sene be nin bee k'a yere ma; forotigi te sonni ke, a te nogo don.

Nka ni foro labenbali don, lozisiyeli E-Sene be ke senekela demenan ye a hakililakow la. Buwatiba min be jiponpe la, kunnafonijininanw be jiko ni nogoko kunnafoni minnu lase o ma, senekela b'a ka sonni ni nogodon ke ka keje n'olu ye. Mansin be kunnafoniw fo i yere b'a men. A b'a fo Mali kan bee la. I mana k'o kan min kelen menbaa ye, i be baara ke n'o ye.

Baba B. Kulubali
Dokala Yusufu Jara

Mønnikelaw jørelen don jegéko kecogo la baw kono

Mønni ye sørðaba ye Mali kono. Mønni kebaa ka ca, wa mögo caman fana be bø u nun ma. I'n'a fo lotolitigw, kurundilannaw, mønnikeminew feerebaaw, gilasi-feerelaw, ani døwrew. Mønni b'a to jegé be soro ka dun, a be mögo caman fana holo don baara la.

Baw ni kow ani dala caman na, bosow ni somonow ye mønnikela fanba ye. Su ni tile, u be jiw kuruba, ka jegew mine. Nka jegé sørða hake dogoya an ka baw kono, jegedunna hake caya, jamanadenw girincogo kókanjege kan, cencenbabø min be sen na baw kono ani dankanw na, jikonobagaw hake cayako jugu, ka fara jaman jugu minnu be ke baw kono sanga ni waati bee la, ninnu ye waleyaw ye, minnu be ka mønnikelaw hamie. An be don min na Segu mønnikelaw yere te jofiliyoro don tuguni. A døw ye mønni dabila ka ko were nejini.

Nin karidon kenefaranda fe, Segu Somonoso ye kabako ye. Konokuluw tun be ka fo-fo jøgon k'o jiriv la. Fjne magamannin be ka ci, fo jiriboluw ni furabuluw be kuru ka wuli. Kamiyonbaw be taakasegin na dankanda la cencendoni na. Sogomanemma kono, an ye pinasi ta Segu dankan na k'an kunda boso-daga do kan. Kurunba in moterikan gannen b'an k'o. Sanga damado kono an sera.

Komani Tanapo ye mønnikela do ye. A ye mønni soro cen ye a fa nofe. A yere be san caman bø mønni na a yere ye sa. An benna n'a bøt ye monnikeyoro la; manton bulalama b'a kanna, ka jalangu melenge a kun na, a b'a ka kurun kono. A tun b'a la k'a ka jegé minnenew bø ka bila kelen-kelen. A dabali bannen don a ka jegé moromorónin minnen hake la. Komani Tanapo ka fo la, sisán jegéko t'a fololama bø tuguni. N'o te kóren zanwuyekalo la, dan si tun te jegéko la yan. A ko u tun be jegé mine folo ka kurun fa tewu.

Jegé mineta fanba ye tinerin, manogo, saalen, nteben, konkón, ani keere ye. San waati bee n'a monnikeminew tun don. Min nafa ka bon waati min na, i b'i fanga digi o kan. Mønnikeminew døw ye filijo, tigelikejo, doolen, zu.

Mama Kuresi san 13 ye nin ye mønni na. A yecogo la, i b'a don

ko nene b'a kan. Ale ko an be don min na mønnikeminew songo ka gelen kosebø, mønniketurunw fana kórola. A k'ale ye tigelikejo min banba kabini lere 2nan waati la, dugu jelen a ma døwre soro o kono jegeden damadonin k'o. Dimogobaw yere be wøyo la o jegeninw dala.

Jegé sannifeere kebaa fanba ye musow ye. U joyorø ka bon kosebø jamaana ka nafoloko yiriwali la. Mama Kuresi kelen k'o ka jegé feeretaw di a müso ma, o ye kurun ta k'a kunda Segu kan n'u ye. Wari min be soro jegé feeren na, o be don malo, jo ani tulu la; nasongo fana be bø a la. Wari to be ke ka denbaya mako gelen werew njenabo.

Ibarahim Kobala ka fo la, tigelikejo banbawaati juman ye sogoma joona ani fitirida ye. Ni Selenge barazi ye sababu juman ye dugubaw ma kranko la, gerentebea don mønnikelaw ma. A be ka jegew sørði geleya; Sabula u balilen don mununmununni na ji fanba fe. O de la jegé te ka soro kosebø tuguni baw kono. A ko kunnafonidilaw k'u jilaja k'a lase jamaana jemøgøw ma, ko barazi datuguli ka ji mine, o be ka geleyaba don jegé sørði la jamana kono.

Kasimu Napo si hake be san 40 ni k'o la. A ye hakililajigin ke a ka mønni temenenw waati dumanw kan. A ko folo, ni mønnikela fila tun ye jøgon ben ba kan, u tun be jøgon dème soro kecogo la. Nka bi, u be jøgon konya. Sariya tun be mønni kecogo la; bee tun wajibiyalen don k'o labato, walasa jegew kana silatunun, ani ka sigida n'a lamini lakana. A b'a to fana, pinasitigw kana jøgon tu ba kan. Nka bi, bonya banna. N'i ma kunnadiya døw b'u tugu k'i sawu n'u ka kurun ye k'i suru ji la, walima k'i ka kurun tipe.

Kasimu Napo ko mønnikela cayara sisán ka danteme yoro kelen na. Wa bosow ni somonow dama te tuguni. Møgo ja gelen werew donna mønni na, k'a soro ka telin. Nataw ma fa, a k'u bee jigi waarola.

Mamadu Danbele ye Segu mønnikelaw ka ton "APRAM" jemøgøye. Ay'aka monnikeminew ce ka ke a ka kurun kono k'a ke ba kan. Møgo døw y'a bilasira ni nisondiya ye. A selen yoro do la, a y'a ka jø fili sije fila jøgon na, ka laban k'a kuru ka da a ka kurun kono. Jegé te yen tuguni; a timinangoyalen se-

ginna o yoronin bee la. Walasa anw minnu nanen don jegéko kunnafoni jinini na, an k'a don geleya min b'a ko la sisan. Mamadu Danbele ka fo la, mønnikela cayako jugu, o de be ka jegé sørði geleya bi. A ko walasa i ka se ka najege soro sisan, fo i ka taa ba yoro jan na. An be don min na denbaya baloli ka gelen kosebø mønni na. Mogøw be ka jø ne misen minnu ke mønnikelan ye sisan, jegeden te to olu k'o. Olu ye bafaga ani kilice ye. A ko ni ba diyara ale la don min na, a ni jegé kg100 be se ka jigin so ; ni ba ma diya, a ka soro te teme kg7 kan.

Segu mara mønnikelaw n'a jegelamaralaw ka jekuluba jemøgø ye Karamøgø Cero ye. Ale y'a jira, ko mønniko be yoro min na sisan, a te ne labenko juman k'o. O feere do ye mønnikela ni jegelamaala bee lakodønni ye, u ka bø jogon kalama. Ni mögo min wulila ka jegemayoro do segere mønni kama, o ka kan ka gøre yenyørø mønniketon na ka sariya labatotaw don. A ko farajøgønkan b'a to u ka se ka u ka baaraw kecogo juman kalanw soro ani ka jegé sørðaw sannifeere bolo-da ka je.

Karamøgø Cero ka fo la, mögo 500.000 be mønnikelaw ka tonba « APRAM » kono. Ton in be tøndenw lafaamuya mønni kecogo juman na Mali kono. I mana bo Mali fan o fan fe ka don Segu mara kono mønni kama, a be wajibya i ma, i ka don ton in na. A ni ji ni kungo lakanabaaw be baara ke jøgon fe mønni sariyaw labatoli siratige la. Walasa jegew ka se ka bugn, fo yoro døw ka kerenkeren ba kan, mønni man kan ka ke minnu na. O matrafacogo juman ye jegelamara ye. Jegé suguya minnu be sørði lamarali ma kosebø Mali kono, o ye manøgø ani ntében ye. Nka ka jegeden ni jegedumuni soro yoro døw la k'o baara in ke, o de ye geleya ye.

Karamøgø Cero y'a jira ko jinini be sen na Mali ka sumansiko ni jirisienko cakeda Iyeyeri "IER" la, walasa ka jegedumuni juman caman soro. O jinini be ka ke kaba, soja, keninge, ani sajøbu kan. A ko a san 3 ye nin ye, jegelamarala minnu be jekuluw kono, goferenaman be jegedumuni di olu ma da nøgo la.

Mamadu Si
Dokala Yusufu Jara

Koronawirisi kunbenni na, wajibi don ka denmisenninw basigi duw kono



Koronawirisi ye kumaden fila ye : korona ani wirisi. Koronawirisi koro ye banakise coronta. I n'a fo an b'a kolozi u be fugulannin min coron muso jumanba kun na, k'a jira k'a ce ka jni ni sungurunni to bee ye. Banakise in b'i n'a fo o cogoya. Koronawirisi be se ka mog'o bee mine. A be ce mine, a be muso mine. A be denmisen mine, a be baliku ni mogokoroba bee mine. N'a ye denmisennin mine, a ninakili be degun. A ka ca a la bana in

taamasiyen don man di u la; nka u be se ka bana yelema mog'o were fe. Koronawirisi banakise misenmannin don. A te ye ne na ten. Dogotorow be mikorsikopu de da u ne na k'a jini banabaato daji, a nunji walima a joli kono. Banakise caman koloisira dogotorow fe ka teme, minnu fana coronnama don. San 2002 ka don 2003 kono, bana jugu min poyira dije kono ninakili degunni na, o welela tubabukan daje surun na Esi arasi (SRAS). Do fana poyira lara bujamanaw na san 212 kono nin-

kili degunni na kokura. Dogotoro Fatumata Diko ye denfurakela ye lopitali Gaburyueli Ture la Bamako. A y'a jira ko denmansaw k'u hakili to u denw na kosebe koronawirisiko la, ka da kun fila kan. Ni bana in y'u soro k'u to si hake o hake la, ni kunnadiya ma ke u ni be se ka to a la. Wa u be se k'u ka banakise yelema mog'o were fe. Angilew be koronawirisi wele u ka kan na kowidi -19 (coronavirus disease -19). Bana suguya min don, a yelemani ka telin kosebe. Banabaato

b'a yelema mog'o kenemanw fe, ni sogosogo, walima tiso ye. Wa banabaato daji, walima a nunji mana se fen o fen ma, ni mog'o keneman magara o la, koronawirisi banakise be se ka noro i la.

Den be se k'a ka bana soro a mansaw fe, walima a balimaw, ani mog'o o mog'o n'a be gere pogon na. Koronawirisi don man di ni taamasiyen kelen ye. Dommikela bee koni benna a kan, ko n'a ye denmisennin mine, i te taamasiyen jenjen si kolozi a la, min b'a jira ko bana in b'a la. Tuma daw la i be mura, walima sogosogo kolozi denmisennin daw la. Dow ta ye ninakili degunni ni farigan ye. Dow kono be boli, u be foono.

An be koronawirisiko tile min na, a juman ye ka denmisenninw basigi duw kono, u kana bo ka taa yaala la. Walasa ka denyereninw tanga bana in ma, a juman ye an ka yelema don an kewale daw la. Jama kana taa u tuntun jubaato dala ko denlaje. Denkundi ni kono fana na, an kana jamadalaje ke. Denbatigiw be se ka nunnabiri biri u nun na, walasa u kana ke sababu ye ka bana yelema u denw na. U ka to k'u tegew ko ni ji ni safune ye, ani ka zeli k'u tege la. An k'an sko damajira ke denmisenninw ladonni na. Ko o ko te wajibi ye, an kana son denmisenninw ka bo du kono ka taa o la. Minnu ye kodon, an ka nunnabiri don olu nun na, u ka to k'u tege ko ni ji ni safune ye, ani ka zeli k'u tege la. K'a fo u ye, ko n'u be tiso, u ka tiso u nunkon kono. U k'u basigi du kono, ani ka furance janin don u ni mogow to ce, walasa ni do sogosogora, walima ka tiso, a ka banakise kana pan ka se a ma.

Fatuma Nafo
Dokala Yusufu Jara

Konoja danteme ye baasi ye kenyeyako la

Konoja be kolozi kosebe Mali kono ; hali ni dogotorow ma jate fo a ko kan, a koni be se ka mog'o caman soro. Nka konoja jatelen te k'a ke kojugu ye foroba kenyeyako la. Dogotorow ka jate la, mog'o be jate konojato ye, n'a te teme siye saba kan banakotaa la dogokun kelen kono. Konoja ye banakotaa sorobalya ye ; hake min fana be soro o man ca. Dogotorow te sin ka konoja jate bana ye ; nka a be dumuniko cogoya de kofu u bolo. Dogotoro Hamaduni Lamin Sise ye furakelikela ye Bamako komini 3nan dogotorosoba la. Ale fe, a be fo ko konoja be mog'o la, n'a be se ka lere 72 ke k'a soro a ma banaotaa ke ; n'o ye tile 3 kuntaala ye. A ko konoja be mog'o soro ni farilajdesse b'a la ; dumuni nafamafen min be wele « fu », n'o dese b'a ka dumuni na ; mog'o min te farilamaga ke, sanga ni waati bee la a b'a no na ; kenyafura tata daw fana be konoja lase mog'o ma.

Konoja cogoya be tali ke mog'o konofenw baarakecogo la (k'a damine dumuni dunni na fo ka se a yelemani ma ka ke banakotaa ye), ani ka tali ke banaw na (funun ni



nugulabana). Fen werew be se ka konoja lase mog'o ma ; an ka dumuni duntaw b'o la ; i n'a fo farinin, buuru, malo jenin, jiriden jalanw ani nafamafen daw.

Konoja be se ka mog'o bee soro ; nka do ta ka jugu ni do ta ye. Kerenkerennenya la, konoja ka jugu

musow ni mogokoroba ma kosebe. Wa muso konojato hake ka ca siye saba ni ce konojato hake ye. Sabula muso be musoyaji minnu ncoeno, olu be yelema don a nugu ka baa-ra kecogo la. Musokoroba fana cekoroba kan, konoja b'a caman na. Sabula u ka farilamaga ka doço,

farilajdesse fana b'u soro ka caya. U ka dumunike man ca, a mana dumuni girinmanw dun, olu te yelema joona.

Kelo be konoja la. A be mog'o kono funun, joli be se ka ci banakotaa kan, a soro li geleya fe k'a sababu ke banakotaa boyero joginni ye banakotaa jalan diyagoya ton-tonni fe. A daw be laban kobo la. Walasa ka mog'o tanga konoja ma, dogotoro Hamaduni Lamin Sise b'a jini mogow fe, u ka to ka ji sebekoro min, walasa farikolo ka se ka fa ji la, ka dumuni yelemani nogoya; k'u yere kolozi dunfen tololenbaw dunneddi na susfe, sabula furu te baaraba ke susfe. Mogow ka kan ka jiriden dun ka caya ani ka farilamagaw ke; ni daw k'o ma farikolopenaje, min b'a to dumuni yelemani ka nogoya. Dogotoro Hamaduni Lamin Sise ko konoja be jate bana ye, n'a kuntaala ye tile naani soro, walima ka teme o kan. Ni mog'o min ka konoja b'o cogo la, a juman ye o ka se dogotorow ma, a ka neijnini.

Salimatu Mariko
Dokala Yusufu Jara

Sunkaloseli kera Kuluba ni wasa ye, ka kenyea sabatiliwalew matarafa



Mogo daw yere be taa u balimasira gunnenw fo hali dugu werew la. Nka dugubaw kono, selimafola fanba ye denmisenninw ye. O de koson kabini selikene jiginnna sogomanegge kanje 8 temennen ni sanga 30 ye, denmisenninw ye dugubolow mine selimafoliw la. Samensamen ye ka dugawu ke pogon ye, ka yaafa ninin pogon fe, ka laban ka "k'an ben" da pogon ye sanwere seli la.

O b'a soro Ala sera ka selimafini nogoya mogo minnu ye, bee parilienba don a ta la. U be yaala ka don pogon kan du ni du, ka selimafoliw ke.

Silamediine yc scldon fana ke yaafajinin don kerankerennen ye. A be mogow tin don pogon na ka taa a fe.

Jamanakuntigi ye ninan seli ke Kuluba, k'a sababu ke koronawirisiko ye. O jamaseli senfe, jamanakuntigi yere kera misali numan ye kenyea sabatiliwalew matarafali la.

Tuma minn na scii kuncera, a y'a ninin jama fe, halibi u k'u hakili to bana jugu in kumbenni walcyaw la. N'o ye ka nun nabiri matarafa, k'i yere tanga ani ka mogo were tanga. Jamanakuntigiso lajekeso kera misiri ye u bolo pinan. U selila o kono. Furanci hake min ka kan ka bila scilia kelen-kelen ce, o labatora. Minisirijemogoo Dogotora Bubu Sise, depitbulon nemogoba Musa Tenbinc, sangabulon tow nemogow, minisiri tow, ka fara jamana minnu ka lasigidew be Mali kono, nin bee tun be sciliyoro in na.

Laada la, seli senkorokoba do ye sanben-sanben ye

Mali kono scilincinin benna sibiri ma mekalo tile 23 san 2020. O ye laada ye, san o san ni scilikene jiginnna, mogow be yaala ka selimafoliw ke pogon na. N'o ye sanben-sanben ye. Da teliya y'o ke "samen-samen" y'an bolo. Wula kono dudenw be pogon selimafo, kabilia kelen mogow be pogon fo, dugu kelen mogow be pogon fo.

Ayisata Tarawele ye Mali ntolantanna musomanw do ye jamana kakan

Ayisata Tarawele tun ye Hamudalayi musomaninw ka ntolatanton mogo do ye. A tun be ntolatan na Turuki jamana na ; nka a ma hali san kelen soro yen ; a yelemana Faransi dugu min be wele Gengan, o ntolatanton « An-Awan » na. O ton in be Faransi ntolatanton janaw na. Ayisata Tarawele y'o ton soro seben bolonobila san 2019 okutoburukalo tile 28 san fila kuntaala kama ; wa san kelen moenobo be se ka fara o sarati in kan.

Ntolanna in ye Ala fo k'a barikada ntolatan soro la kakan, o seben filanan bolonobilalii la. A ye foli ni tanuni lase a ba fana ma, o min ye ko caman ladiya a bolo. Ayisata k'alc ka kakan ntolatan soro, o sababu do y'a ba ye. A hamii ka baara ke kosebe, min nininen don a fe, a ka se k'o sabati. Nka ayere ka lajini ye min ye Gengan, o de ye a ka se ka lakodon kosebe muso ntolatanna janako la.

Gengan be joyoro 6nan na Faransi ka janapini ntolatanw na. Ayisata be to yen fo ka se san 2021 zuwenkalo ma. Afiriki tilebinyan-fan sennantolatan « zoni A » kupu ntolatanw kera Siyera Leyoni k'a damine desanburukalo tile 8 na ka se a tile 22 ma san 2019. N'o ye kupu « UFOA » ye. Mali kera joyoro 4nan ye UFOA « zoni B » kupu la Abijan. A hamii tun ye « zoni A » kupu tali ye.

Ayisata Tarawele be dugawu jini Maliden ceman ni musoman bee fe, walasa a na se ka Mali ntolatan kunnawolo a nema ; o de y'a haminanko ye bi. A si hake be san 22 la. Mali ka san 2015-2016 ntolatantonw ka janapini ntola-

tanw na, Ayisata Tarawele kelen ye bi 25 don. Musow ka Kani min kera Gana, a kera sababu ye Mali ka se demisinali ma. Kameruni de y'u gosi yen 3 ni 1 k'u bali ka se finali ma. O Kani kofe, kofejamanaw ye wulikajo damine a nefe. Ala y'a ni Turuki ntolatanton do garijegge don pogon na. A ye kalo 6 ntolatan bolonobila yen. O ton min be wele « Besiketasi », a kera sababu ye o ka ke ntolatanton janaw ye Turuki. O la o y'o kelen ye ka se soro ka se Erropu musow ka ntolatanton janaw ka kupu ma.

Bee tun y'a jate mine ko Ayisata tena to Turuki bolo tuguni, ka da a nafa kan ; kerenkerennenya la, Faransi ton caman bolo bole tun b'a nefe. Ntenendon okutoburukalo tile 28 san 2019, Ayisata Tarawele ye pankurun ta Turuki faaba la, ka taa cun Gengan, Faransi dugukolo kan, ka san fila ntolatan seben bolonobila ; san kelen moenobo fana b'a ne o seben in kono, n'u ma tige pogon na sanni sarati ka dafa.

Ayisata Tarawele ni musomanin were minnu ye ntola tan Mali Samatasgew fe, n'olu yelemana ntolatan na kakan, o daw ye Sebc Kulubali (RC Sen-Denisi), Jeneba Baraji (Sen-Denisi), Yakare Nagate (Sitadi Besituruwa), Ayisata Jadiyu (FC Domon), Aminata Dukure (Sen-Denisi), ani Kani Kente (VGA Sen-Mori).

Ayisata Tarawele taara a soro a ka ton kura in, n'o ye Gengan Annan-fan "En-Avant" ye, o tun be u ka janaya ntolatanw joyoro 6nan na, tile 7 ntolatanw kofe ni kuru 9 ye. Tuma min na a y'a ka ntolatan benkanseben bolonobilala, nemogow y'a jira u ka ntolatan-



naw sankoratabaabaw la. Gengan sera Faransi kupu wicemudefinali ma karidon zanwuyekalo tile tile 12 san 2020 k'a sababu ke Ayisata Tarawele ye. A ye Fulori gosi 2 ni 1 seziyemudefinali la, ka ntola ke 1 ni 1 ye. Gengan ka bi folo donna Luwii Fulori fe, a filanan donna Ayisata Tarawele fe sanga 9nan na ka sebaaya di Gengan ma ka taa wicemudefinali la. A ni Soyo Sarenti be pogon soro o la. Ale fana ye Hansfuru gosi 2 ni 1. Ntolatan in bannen, Gengan degelikaramogoo Feredciki Biyankalani ye Ayisata Tarawele fo k'a tanu kosebe u kunnawololi la. Kabini Ayisata nana Gengan ntolatanton kono, nin kera a sije folo ye ka bi don. Hali Faransi ntolatanton ka janapini ntolatanw na, a kera sababu ye ka sebaaya caman lase a ka ton ma. Jeneba Bagayoko

Dokala Yusufu Jara